

水

曹

清

暇

錄

水曹清暇錄卷十二

古歙詠菴汪啓淑述

宋王荊公詠竹云人憐直節生來瘦自許高材  
老更剛曾與蒿藜同雨露終隨松柏歷風霜玩  
味詞意具見其抱負不凡惜乎太執拘耳

金山縣朱涇鎮陳姓娶一妾頗美甚嬖之忽爲  
怪物所據反拒陳與同寢間亦現形乃一黑胖  
少年捕之不得後其妾漸癡迷陳延武林某道  
士治之妾於牀間忽大叫曰法師饒我怪遂去

鑿葯經時妾始神定詢之如夢寐事

市賣盆菊多用艾根所接頗有細種以及異樣  
變種之花然不能留苗良可惜也

前明婦人首飾花鈿多尙燈光石及蜜蠟近時  
皆用登萊石藍田玉而禽魚述云鱗魚之鱗石  
灰水浸曬乾層層起出以作女人花鈿今竟絕  
無之矣

內外城向有酒館戲園酒饌價最貴初南來者  
未悉每受其累一夕幾費十金近奉禁止誠善

政也

嘉興秦吉兩孝廉結伴公車北上行次山東而  
吉病力疾行兩日憊甚秦因勸吉賃一招提養  
疴吉乘輿輿至寺見齋區卽駭然曰予儼裝之  
夕夢人送一匾卽此二字迨將終於此乎秦慰  
勸之吉夜就枕恍有人來叩見稱是長班報喜  
云吉老爺已補河神現有委牌呈看約三日後  
騶從來迎次日病勢沉綿吉語之秦疑信參半  
荏苒數朝吉忽云接我者已在門矣急書遺囑

晚秦付其弱息且戒子姪讀書爲善果報無爽  
訂秦他日經由尙可圖晤隨卒秦爲經紀後事  
兼慮寄存旅櫬終非妥計決計不赴春明傾囊  
買舟送吉柩歸一時戚里頗稱秦之高義下科  
秦卽獲雋兼得館選年餘乞假南歸泊舟草壩  
突夢吉來輿從頗盛悉如人間拜謝扶柩且報  
秦之福祿頗綿蓋吉平素爲人正直秦語同鄉  
同官人故知之

莫是龍遺字一篋以助貧友嫁女顧有孝賣隸

儲金以葬徐俟齋高士皆不負學書也

臨川游氏有女字宛平張生旣冠而夭魂化蝴蝶飛入游氏之室集女掌上女大慟過門送殮矢志栢舟簪石錢侍郎載有詩紀其事

東坡適判事而寫生之興偶發遂以硃筆畫竹數竿人皆以爲創格殊不知卽丹竹也產恩平縣邑乘且云采其稚者以灰煮之可續爲布更異矣

浦江朱太史濂六歲入小學師取季泮蒙求一

日而盡自後日記二千餘言九歲卽能詩有道  
士樓節翁乞之操筆立成四韻有步罡隨踢脚  
頭斗嚙水能轟掌上雷句故有神童之稱

明華亭陳繼儒客元龍姚氏家姚氏有僕吳忠  
服役甚勤伺徵君寢後輒於樓下鼓琴徵君延  
與語呈一題桃花詩云遊子訪桃源桃源在深  
處不必問漁郎谷口隨花去陳賞之勸其託疾  
辭主他去何松人之不樂人有佳僕也

寶泉局土地祠所塑阜隸四人素靈感爐頭鑄

工皆時祭饗比年頗不安分凡匠工之年少稍清秀者夢中每被鷄姦手足如有所繫不能轉動口不能叫醒後大便竟有青泥後遇伶俐匠工記其面貌則宛然四隸中一人也公啓於司局之官而毀其身其怪乃絕

國初上海縣烈婦施氏徐維生之室也適徐二載卽賦栢舟公姑貧老族人唆使欲奪其志氏剪髮毀容斷一指以誓竭力紡織供甘旨并葬其三世之喪臨窆有數白鶴悲鳴繞墓三晝夜



人咸以爲節孝之瑞事見邑乘

舊唐書寧寇軍東北有居延海海北三百里有  
花門山堡杜子美集有留花門詩云花門旣須  
留原野轉蕭瑟蓋回紇留兵花門其意易明今  
則訛稱爲留花門殊誤

順治庚子歲吉安山中忽產異蜂兩翅黃黑色  
相間隱隱有王字人遂稱爲瘟王集人廬舍必  
須齋禳沿江七百里一時喧傳後被長汀黎明  
府將蜂釘於堂柱嚴行禁止訛言始息

長汀縣稱迂闊拘牽之人曰牛毛吾邑稱顛狂之人曰硃砂殊可一咲

易州熱河山中杏樹倒於澗水中千年光如水精夜置暗室毫髮皆見

史記滑稽列傳其後百餘年楚有優孟按優孟楚莊王時事也在淳于髡之前二百餘年似有錯謬

月經見素問絆變見佛經絆變又見說文有所避見漢書月客見神仙服食經入月見唐人詩

九唐清明錄 卷一 二  
句皆指天癸水言也

乾隆十六年八月景山遺失陳設古玩數件內  
務府官疑挑土工人所竊集訊之忽一人偃偃  
然長跪訴曰我常格也係正黃旗人年十二歲  
入市買物被工人趙二圖姦不從用刀殺死埋  
於厚載門外堆炭地方求官申冤言訖仆地俄  
復躍起自稱我卽趙二內務府官移交刑部掘  
地驗尸眞實訪其父母始云一月以前失兒尙  
未知其故也復訊趙二吐供如繪擬斬立決事

見邸抄

柔卿本夢樓王太守文治家女伶色藝皆工後  
長成夢樓養爲已女許配士族曾見其病起一  
絕云卧病深閨欲浹旬晚來強起怕傷神秋心  
自是人先覺不信黃花瘦似人

雲間張司寇照第三女名應芝生時庭產瑞芝  
故名幼聰慧二齡卽能識去來二字易地試之  
不爽三歲卽知男女之別不與家人授受什物  
時司寇乞假歸江蘇見父作家書知再拜問起

居如成人五歲適屆天旱都中百寮咸求雨應  
芝聞之亦於日中拜跪祈禱六歲爲庸醫所誤  
天卒

向在吳門骨董漢士崑扇頭曾見胡淑貞一絕  
句筆法適媚相傳是狐仙詩也疑其託名者頃  
閱宜興縣志始悉確有其事因錄其詩云閒題  
麗句寄瑤臺邀取飛瓊駕鶴來遲日暖風烟景  
媚碧桃花下其持盃風致殊覺可人

德州雅雨廬見曾運使五短身材精神炯炯學

亦淹貫謫官守臺有出塞集詩文佳者頗多予  
尤愛其生祭蔣蘿邨文想奇筆健洵爲可傳其  
詞曰先生之壽七十有七先生之壯如其壯日  
先生曠達不諱其恤先生有教乃載之筆先生  
書來示我云云昔同轉運與君爲寅今同謫戍  
與君爲鄰我欲生祭乞君一言僕謝不敏非甘  
懶惰詛老咒生無乃不可旣而思之公非欺我  
辱公之教奈何弗果爰卜吉日乃駕黃驪羔羊  
烝炙醑酥淋漓乾饌簪酒載攜載隨造廬展笑

大放厥詞昔公早達久食天祿遭際堯廷而登  
憲副有其志之非僕所錄僕識公晚蓋始投荒  
過公信宿示我周行何以圖報祝壽而康今年  
聞公報三周歲憶公語我軍臺有制諸弛形徒  
考績爲例瓜代爲常喜而不寐何期命宮磨蝎  
流連 帝聞臣罪未聞臣年草霜風燭能否再  
延有死之心無生之氣僕忝同羣敢忘敦慰言  
之違心聽之無味破涕用奇于是乎祭世之祭  
者羅鼎列牲豈無醑奠誰進一觥豈無呼告誰

應一聲禱爾曰誅莫若及生我聞設臺防厄魯  
特雪山爲窟師老難克鬼能爲厲殊便殺賊生  
不如人死當報國我聞西域佛教常新恆河沙  
數皆不壞身此去天竺無間關津一靈不昧便  
入法門我聞閻羅卽包孝肅其家廬州僕曾爲  
牧牧不負神神應電矚爲問年來神頗憶不我  
聞冥司分隸城隍我輩頭銜頗與相當定容抗  
禮謙尊而光豈如井底妄肆蛙張我聞此地李  
陵所竄苗裔及唐猶通祖貫遊子河梁妙絕詞



翰地下相逢定非冰炭我聞歸化葬古昭君青  
塚表表血食爲神乃心漢闕同鄉是親死如卜  
宅請傍佳人凡諸幻想謂死有覺有覺而死不  
改其樂若本無知何嫌沙漠滄桑以來誰非委  
壑公曰信哉君言慨慷君浮我白我奉君觴飲  
既盡興食亦充腸飲食醉飽是爲尙饗

吾鄉蕪湖湯姓以鐵打成山水花鳥初爲掛屏  
近亦製而爲燈前此似未有詠之者頃金國博  
兆燕誦其少作二絕云傾亞玲瓏意匠周巧工

丁緩信難求鑪錘神技休相詫挾術祇緣繞指  
柔寂歷空明霜夜深小山儒士抱冬心而今海  
內珍勞鐵誰探荒山匿甘金

佛法世傳漢明帝永平七年始入中國然考秦  
時沙門室利房等已至始皇以爲異囚之夜有  
金人破戶而去漢武帝時霍去病過焉支山得  
休屠王祭天金人以歸帝置之甘泉宮金人卽  
今佛像也

社音常者切江浙間多讀作射非也从示土土

祇也春秋傳曰共工之子勾龍爲社神周禮二十五家爲社各樹其土所宜之木故子貢曰夏后氏以松殷人以栢周人以栗也

前明唐伯虎童婦皆知蓋以善書畫文章也宋朝已有兩唐伯虎王鞏隨手雜錄云全州進士唐伯虎一日病卒心獨溫因不殮數日還魂云初若夢去見冥官曰誤矣遣歸謂伯虎曰到人間須轉法華經爲報并當勸人誦之伯虎請查他日某得祿否冥官曰雖得祿第微耳遂甦後

任梧州推官年六十餘卒唐子西之兄亦名寅  
字伯虎

人稱詩經爲毛詩蓋大毛公享小毛公萇曾作  
詁訓傳耳然毛公之前六國時已有仲梁子作  
傳矣

內外城俗稱小兒聰慧者爲乖角竊疑乖字似  
非佳語頃閱瀉山語錄云去就乖角僧體全無  
可見乖角乃狡猾之意也俗人不察誤稱遂傳  
訛耳

曩年客邗溝曾見董賢小玉印思作一歌適被  
催租人敗興頃從魚門程太史晉芳集中見有  
此題詩極博雅議論純正因錄其篇云雄狐化  
雌氣不振榮落匆匆抵朝薜漢家會鑄鄧通錢  
後代猶傳董侯印龜衡方紐二寸盈衛將軍董  
不記名篆文道勁類披籀四規汗血紅絲縈牢  
耶石耶綬若若後來年少仍高爵避塵拜謁有  
孔光何事單于偏錯愕賜珍賜第未足酬便房  
窈窕身後謀若教禪授法堯舜國璽奚待文母

投反膺高視者誰子胸藏鋸刀暗相擬免冠收  
綬太倉皇斷袖恩深爲君死君不見將軍猿臂  
力挽強馮公白首還爲郎秉珪列爵天所吝翻  
使若輩懸青囊我聞衛青玉印元朝出古物斑  
斕鐘問匹已驚高塚尖祁連尙有豐功傳鉅筆  
吁嗟此玉何不辰穢名鏤刻垂千春桓魋之馬  
申侯璧一笑迷途紛接迹

時人多稱銀爲朱提殊不知朱提見漢書地里  
志蓋出銀之處非銀號朱提也蘇林漢書音義

朱音銖師古註提音匙

廷杖將應杖之人北向直伏兩杖俱下如滿杖四十卽是八十蓋五代劉銖已先有之謂之合歡杖

廣武一縣名一地名漢王項羽相與臨廣武之間此廣武在荊陽婁敬傳上以警匈奴不可挈以爲妄言阻軍乃械敬至廣武此廣武在晉陽卽太原郡之廣武縣也

香山去圓明園約廿餘里獨有翠色中有碧雲

寺最爲幽勝故公醵詩有句云西山千百寺無  
若碧雲竒也又有永安寺由畫廊登慈恩殿之  
右香爐岡下巨石二狀如蝦蟆石下二井清冽  
堪淪佳茗然近日不可得遊矣

灑馬騎達驛詐馬卽騙馬也縱馬先馳飛步追  
及騰身騎上或翻鞍或翹立鞍上種種逞其迅  
捷耳

古人鑽龜以卜粵西則以鷄骨占年塞北炙羊  
肩髀以覘吉凶夫人爲萬物之靈何休徵反兆



於畜類也

房山向有玲瓏巨石高約三丈廣幾七尺色青潤而洞透米萬鍾曾竭力欲運安勺園行次良鄉石重竟不可致乾隆年間取入萬壽山之樂壽堂錫名青芝岫

月中斫桂人名吳剛月中又有一仙名宋無忌今時知吳剛者多知無忌者則甚少然同見于段成式酉陽雜俎中何顯晦迥絕

唐崔戎爲華州刺史徙交海百姓遮留不得行

抱持其韉泣崖戎棄韉單騎而遁今之良吏臨去民人脫韉想其遺意也

羽緞羽紗出外洋荷蘭暹羅諸國王阮亭香祖筆記云康熙初年入貢止一二疋今蘇杭市井中人亦皆服之矣又云滿刺加哈烈出鎖袂一名梭服亦以鳥毳爲之今則罕見而近日又興羽毛縐一種又出番巴一種並有碎花圍花顏色雅致者價甚貴似前此所無也

宋閨秀李清照所著漱玉集雖不得見然王阮

亭香祖筆記云伊兄西樵所撰然脂集止覓得其詩二句少陵也自可憐人更待明年試春草此外了不可得阮亭又於陳士業寒夜錄尋得和張文潛浯溪碑歌詩二篇豈未見雲麓漫鈔有上樞密韓公工部尙書胡公二篇其小序云紹興癸丑五月兩公使金通兩宮也易安父祖出韓公門下見此大號令不能忘言作詩各一章以寄意待采詩者其詩云三年夏六月天子視朝久凝旒望南雲垂衣思北狩如聞帝若曰

岳牧與羣后賢寧無半千運已過陽九勿勒燕  
然銘勿種金城柳豈無純孝臣識此霜露悲何  
必羹捨肉便可車載脂土地非所惜玉帛如塵  
泥誰當可將命幣厚辭益卑四岳僉曰俞臣下  
帝所知中朝第一人春官有昌黎身爲百夫特  
行足萬人師嘉祐與建中爲政有皐夔漢家畏  
王商唐室尊子儀是時已破膽將命公所宜公  
拜手稽首受命白玉墀曰臣敢辭難此亦何等  
時家人安足謀妻子不必辭願奉天地靈願奉

宗廟威徑持紫泥詔直入黃龍城北人定稽顙  
侍子當來迎仁君方博信狂生休請纓或取犬  
馬血與結天日盟又詩云胡公清德人所難謀  
同德協心志安脫衣已被漢恩煥離歌不道易  
水寒皇天久陰后土濕雨勢未回風勢急車聲  
麟麟馬蕭蕭壯士懦夫俱感泣閭閻嫠婦亦何  
知瀝血投書干記室葵土踐土非荒城勿輕談  
士棄儒生露布詞成馬猶倚峭函關出雞未鳴  
巧匠何曾棄枲櫟芻蕘之言或有益不乞隋珠

與和璧只乞鄉關新信息靈光雖在應蕭條草  
中翁仲今何若遺氓豈尙種桑麻收將如聞保  
城郭殘家父祖生齊魯位下名高人比數當時  
稷下縱談時猶記人揮汗成雨子孫南渡今幾  
年漂零遂與流人伍欲將血淚寄山河去灑東  
山一坏土而彤管遺編亦載有曉夢一篇云曉  
夢隨疎鐘飄然躡雲霞因緣安期生邂逅萼綠  
華秋風正無賴吹盡玉井花共看藕如船同食  
棗如瓜翩翩坐上客意妙語亦佳嘲辭闕詭辨

活火分新茶雖非助帝功其樂何莫涯人生能  
如此何必故歸家起來歛衣坐掩耳厭喧譁心  
知不可見念念猶咨嗟又感懷詩云寒窗敗几  
無書史公路可憐合至此青州從事孔方君終  
日紛紛喜生事作詩謝絕聊閉門燕寢凝香有  
佳思靜中我乃見至交烏有先生子虛子又春  
殘詩云春殘何事苦思鄉病裏梳頭眼最長梁  
燕語多終日在薔薇風細一簾香至釣臺集亦  
載有夜發嚴灘一絕云巨艦只緣因利往扁舟

亦是爲名來往來有魏先生德特地通宵過釣  
臺至風月堂詩話且載有逸句云詩情如夜鵲  
三繞未能安又詩話雋永亦載有逸句云南來  
尙怯吳江冷北狩應悲易水寒南渡衣冠少王  
導北來消息欠劉琨此數種非僻書也阮亭豈  
皆未見耶

夏枯草名乃東冬至後生五月卽枯故名夏枯  
蜩斗名活東枇杷花名欸冬亦名欸東

法雲寺在西山之後萬峯圍裏寺在山巔而遠



望不見寺左右有礪泉跳珠濺玉滙於寺門內  
方池之中金章宗時名香水院有大銀杏樹二  
株大約數十圍翠色參天殊可觀也惜遊跡所  
罕到

提督琉璃廠木倉冰窖街道廳馬廠等差皆每  
年奏派更換

正陽門月城西有關聖帝君廟最靈感求籤者  
日數百人所發籤直指人心後時多應驗故香  
火極盛

新疆烏魯木齊巴里坤等處泉甘土沃花草繁  
盛多不知名虞美人花有大如芍藥者聞之換  
班人云

綠蠶遼東產也康熙年間瀛臺蠶房曾育之子  
公成龍目擊以告阮亭王司寇見居易錄

水曹清暇錄卷十三

古歛詠葦汪啓淑述

回部平定後奉正朔歲納貢更獻其繩技之戲  
予曾見之矯捷幻變實有可觀編修程晉芳有  
回人伎樂府一篇形容酷肖且寓規戒洵是傳  
作其詩云回人伎勤政樓頭揭竿起乞薛倒刺  
何足言都盧尋橦差可擬深凹醜凸爲一部碧  
雲嫋嫋連竿尾吹螺打鼓響多端欲上先如畏  
勢難偏從疑憚出奇巧足捷身輕肖飛鳥上竿

手足皆放空一身盤旋隨廻風又向竿頭施軟  
索天高地虛難立脚豈知繩軟足更軟有如蟻  
附膠黏著回人隊倏爾翻身半天墜已身則定  
人胆碎面不汗沾神弗悖一人猶曰繩可勝更  
三兩人以次升或相擊刺或揖讓往來在換交  
肩肱宸懷對此深怡悅內府金錢頒賚物拜  
賜欣欣笑舞歸羶風成陣過城闕回人回人吾  
語汝汝毋以技相矜詡聖人意在柔遠人假  
之顏色妙鼓舞不然曷視我中土何奇不有景

不聚卽如繩技亦所長纖腰矩步呈樂方明眸  
迴轉耀雲日險竿直上華裾揚豈如爾曹態惡  
俗佳處不能傳委曲回人爾戴者天仰者日生  
爾仁心去邪術城西旣爲汝置營城北方爲汝  
築室貸爾殘魂煑爾家 九重恩意海無涯倘  
云獻伎喻芹曝厥忠厚意猶可嘉回人回人毋  
黷貪毋刼奪錯雜民居庶寧帖不然司寇寘之  
法毋俾易種爲臣妾程本選君負此才筆宜其  
改官玉堂也

豐臺芍藥妙絕天下瑰麗實過鼠姑濃芬馥鬱亦鮮其儔且性耐久不似錢唐蘇臺邢溝材地柔弱午時欲睡洵是艷品

銀魚不獨產之析津寶坻亦出云生蛤山之下秋深霜降上溫水中散子暎日遠望波皆銀色人因候而網之

豐潤縣有古銅鼎其銘文云維甲午八月丙寅帝若稽古肇作宋器審厥象作牛鼎格於太室從用享億寧神休維帝時寶萬世其永賴家上

湖太史師韓考核以爲政和時製邑令潘應椿  
子中表弟昆也有古鼎歌豐潤古鼎何瑰奇銅  
花土暈光陸離傳聞出世始宏治邑人鑿井初  
得之薦諸廟堂備禮器我來作宰欣詳窺隆隆  
大腹耳旁出廣尺有咫崇殺茲明於斤者重五  
十厥象爲牛三足垂有銘在中類篆籀四十一  
字皆可稽八月丙寅歲甲午帝若稽古盟神祇  
肇作宋器格太室用享億萬無差池粵稽牛鼎  
出儀禮聶氏圖說今留貽三足牛首飾其類魚

鼎難狀將誰欺子邕所尊作牛體六家畫鳳亦  
畫犧可知古圖已矛盾出奴入主嘗交咄况復  
紀年用甲子創自新莽古未知此鼎歟識洵摹  
古按圖同異終游移卽今宋制祇詮宋劉宋趙  
宋還紛岐或謂肇造始孝建雕鐫物象妙二儀  
孝武御治維八月用享太廟理亦宜武陵初起  
元嘉末斯時宋室方陵遲上溯永初三十載明  
堂未立荒本支大明五年制粗備有司始奏列  
鼎彝陳氏考古傳漫錄歲月無乃多參差南朝



重器誰輦致鬼物著手安所施上湖老人精鑿  
別證以史冊良無疵政和改元歷四稔龍集甲  
午符其辭郊廟制作悉從古法物一一爲清釐  
鑄金磨石森羅列尊爵俎豆餘盤匱維時詔定  
明堂制九階四陌開宏規五室旣成位列丙用  
據福地縈堂基聿隆禋祀衍列祖罔作此時應  
無疑我聞靖康丁板蕩寶器北去半騰馳辟雍  
石鼓亦零落此鼎乃獨完無虧瓊色席裏走烽  
火斯時豈有神護持玉魚金雁尙出土沉碑埋

劍猶難縻矧茲範金昭象物甃井詎譌爲釜錡  
榮光燭天地軸振倩爾畚鍤里鬻鬻薦之黷宮  
配犧象明馨黍稷歆吾師要知神物不終沒升  
沉顯晦原有時請看烺烺天廟器摩挲我日忘  
勞疲骨重神寒自千古劉趙著代何足推試爲  
作歌紀其盛邑人寶貴恆於斯鼎重五十觔高  
一尺二寸五分闊尺有六寸耳旁出高三寸弇  
口圓腹足高七寸足上作牛首形足下作牛蹄  
形古色陸離殊可觀也

本部軍需庫舊貯吳逆三桂鐵冑一頂形製甚巨想其首定魁梧節慎庫舊貯一古玉笛惟三孔吹之聲不協律然古色爛斑非近代物

覺生寺在西直門外雍正十年取萬壽寺沈度所書全部蓮華經大鐘懸此而建寺焉

貴州思南府文鷺洲產異石每多肖形湖南長沙縣周克鵬明府予世交也曾語予云伊伯周宣武曾官其地得一黑石長三寸許闊徑寸中有白質蜈蚣一條頭足皆全作翻身勢家藏多

年近爲梁臬使敦書索去

良鄉縣廐有神馬一匹骨相權奇嘴蹄跋扈人多莫敢近去來無定踪相傳爲廐神坐騎號曰神馬良鄉令陸耀署中西賓張國學竊有神馬篇其詩云良鄉縣馬三百匹苜蓿春肥百不一可憐骨瘦如堵牆那得蹄高誇踣鋏連朝絡繹來官差食料纔半出馬牌豈無一二十大宛種長途力盡死卽埋廐中一馬雄顧盼似向天育圖中見額高九寸毛盡拳鏡夾雙瞳燄如電縣中

健兒控不得云是廐神之脚力無端馳突跡無窮  
倏爾歸來汗流赤或聞此語變顏色事涉虛無  
勿爲惑君不見周王八駿天下行又不見夏后  
雙龍天降精任爾騰驤號神駿呈材天廐名始  
成彼獨胡爲但放縱抑或不遇王良控倘鑒驚  
駘能死忠盍貶情性乘時用嗚呼盍貶情性  
乘時用

倬直官吏連直也唐志新到官府併上直謂之  
倬直一作豹直亦曰伏豹蓋取不出之義

凡騾馬打破迎鞍用粟米炒焦研末以真麻油調敷數次卽愈屢試皆驗

頃過笥河朱學士筠書齋見案頭春星草堂詩二冊詢知爲海鹽石帆吳孝廉熙所作也石帆爲吳忠肅公麟徵元孫丁酉舉鄉闈戊戌公車北上行次山左車覆被礮負傷天卒年僅三十餘耳有才無命良可惜也緣摘錄其數篇於左其遊子吟云東風吹揚花飄蕩靡所底男兒辭故鄉一去幾千里非是慕遨遊無計安桑梓茅

店一聲雞征人次第起霜寒風如刀太息發軔  
始相逢同鄉人陌路皆知已殊方異苦樂兩地  
味生死依依還山雲粼粼赴壑水無情尙有歸  
哀哉行旅子其曉行云出郭風淒淒殘星沒平  
楚夾路桑柘陰深入不知處晨光一相照苦霧  
滴成雨悠悠曉行人一步一延佇其題家復園  
叔雅集詩冊後詩云蒲花深處啓松關綠水紅  
闌面面環聞道衣冠盛江左祇今文讌想人間  
畫中雲氣西泠近社裏詩篇北宋還太息復園

荒宿草猶誇高會繼香山其西嶺詩云幽居倦  
炎蒸駕言陟西嶺西嶺佳有餘孤賞興彌永巖  
花侵衣碧松陰覆體冷林棲寂無聲石瀨喧復  
靜溪廻颿長風雲歸明片影幽阻淡孤懷窈窕  
駐修景稍覺晚涼生差喜人跡屏徙倚烟光前  
去留惜俄頃其登樓詩云霜落南天一雁來登  
高客思正難裁隔溪寺廻鐘聲遠背郭園深竹  
逕開烟雨晝迷徐福島江湖夜轉伯牙臺不堪  
歲宴仍留滯日夕山城畫角哀其自歎詩云支



離誰數可憐蟲柄舌方心百未工底事生涯拋  
不得流年強半壁光中食藿衣麤陋巷閒此生  
三上不曾閒憑誰喚醒篝燈夢臧穀亡羊總一  
般皆清麗典雅可傳亦可謂不死矣

毛紹蘭號雲樵浙江遂安縣丁酉拔貢戊戌至  
都 廷試不與南歸有留別同人詩四章其次  
云來時楊柳正依依忽覺敲窗葉又飛怯夜陰  
蛩偏未歇驚秋客燕已遄歸但能索米居原易  
頗悔燒丹力尙微此去淮南見雞犬雲中莫哂

素心違其末云飲餞連宵醉似泥彩毫分綴巧

雲低

白華先生暨蕤衡蘭畚仲則笙聞素中蔚林諸同人俱在贈章

波濤漫遣

填烏鵲

時屆七夕

才調誰當頌碧雞望

闕心飛環

極北住家夢穩釣臺西清時敢便成歸隱還待  
花香引馬蹄清潤可誦

吏部禮部翰林院詹事府衙門皆奉祀昌黎韓  
文公爲土地然不知其何所據

予向客甌江曾見木中天生福字深爲神異頃  
閱魏叔子文鈔文木屏記云余客橫溪得文木

之屏一方九寸攢嵐積嶂夾山之閒瀑布噴下  
流于無際屏陰亦然文皆隆起可捫而得也一  
方六寸空濛中見羅漢騎獅子頭目口耳鼻鬚  
睂卷髮毛尾畢具天地生物精巧何至于此良  
可駭也

頃在桂副車未谷處見林吉人蕉白端石硯形  
製質樸銘文古雅漫錄於此其辭曰離汝一生  
則俗依汝一生奚福不得不藏汝于匱

智化寺在今內城貢院後前明崇祀閻惡王振

之所 國初磨其穹碑毀其穢像改爲萬佛樓  
人心太快

程志乾字學堅儀真人編修晉芳之再從弟也  
工於詩有旅邸七夕云情當離合誰能遣事卽  
荒唐亦可憐爲人所傳誦又旅夜云寒雞失候  
多啼月旅夢無蹤只戀家

孔明心書前明胡少室以爲歷代藝文書目從  
未見載遽斥爲僞然其辭氣醇雅恐蘇明允尙  
難擬議豈近世人所能假託耶

邢臺縣陳大有者充府快役與一女優相狎納  
以爲妾年餘歡愛漸疎陳時外出遊於廟會集  
市縱博酣酒經月不歸女優頗有懷春之思夜  
忽有怪突入女室藍髮赤面容貌醜惡可畏與  
女求合女畏而堅拒之怪曰汝本優也不過愛  
鈔吾按日與金何辭爲女仍不從然四肢已似  
束縛不能轉動任其淫蕩臨行與錢二百夜以  
爲常黎明視之皆楮錢耳而女飲食漸減形容  
憔悴困憊日惟思睡醫藥無效大有歸而與女

同寢置刀枕傍欲以殺怪方合眼女已被汚覺而逐之渺無所見大有深以爲恨時有寧晉男覲孫拐子者工跳神之術大有延之於家求其驅逐拐子焚香設饌瞑目危坐許時遽告陳大有曰鬼病也應在東南二三里外有泥塑小鬼頭上無塵土者仆而碎之怪卽可除陳大有遂行歷諸大祠宇最後至東嶽廟果有泥塑鬼形頭上光潤無塵土大有欲毀其像恐爲廟祝所覺乃雇一竊賊乘夜撲爲粉齑有血流出其怪

尋絕女病亦瘥忽而廟祝瘋狂披髮持刀不時  
登大有門指名喝罵曰跟馬奴何敢壞吾金身  
拐子用術爲貪財鼠賊行竊爲受賄吾皆不較  
止誅爾首惡一人大有震懼不敢出爭鄰里從  
中調停許以演戲奉神金粧塑鬼廟祝許焉大  
有一如所命廟祝心疾頓愈而女亦無復鬼祟  
矣此乾隆甲午歲事也嘉定令半塘姚君爲予  
述

閨秀屈鳳輝字梧清浙江平湖縣孝廉屈宗到

之妹也所著有古月樓詩鈔工於詠物其洋鷄  
詩云也有啼聲出苑牆攜來毛羽話殊方短籬  
小試籠中翮五夜寒驚海外霜莫倚花冠爭飲  
啄敢從金鉅闕文章可憐舊侶今何在萬里波  
濤是故鄉其美人蕉詩云冷翠從窻月影逗珊  
珊弱骨不驚風芳情萬縷深如海併入牽心作  
碎紅皆清新可誦

燕窩石在昌平州形類盆其下刻燕窩二字畿  
輔古蹟志云遼時遺物也至今尙存



炸子橋有松筠菴古藤高柳門徑幽邃高念東  
侍郎珩所請歸田後暫寓居焉馮益都相國文  
毅公過訪之念東有詩云戶倚雙藤禪宇開無  
人知是相公來相看一笑忘朝市風味依然兩  
秀才王阮亭和云二老前身二大士相逢半日  
晝爐灰他年古寺經行地記取寒山拾得來今  
寺尙存而古藤高柳已摧殘矣

乾隆丁酉科陳殿撰初哲與程主政世淳主秦  
省試程中定二十五卷送閱內某號一卷紕謬

甚多陳欲去之另以備卷頂補方欲粘簽卽聞  
鬼聲四起徐至窗外長嗥尋入室中揶揄擾至  
黎明諸鬼乃去陳以考院久無人居疑狐爲祟  
亦不之怪造程商酌去取程聞之大慟失聲言  
曰先君子皓首科場三經獲雋皆以正副主司  
意見不合抑落孫山之外由今追昔不覺感傷  
至此卷之疵類愚亦見之其去取何關輕重第  
以愚念及之情不能禁祈於格外錄之陳勉從  
其請榜後來謁則祝振聲一村學究二公爲歷

言其故詢以有何陰騭祝因自敘春夏務農秋冬訓蒙不惟不能爲陰騭亦不知何者爲陰騭固問之乃曰幼受文昌陰騭文自二十八歲時每晨漱口焚香拜讀一過今年五十八歲矣行之三十年而不倦生平惟有此事他無所知三公曰汝能讀卽能行卽此已是陰騭因厚贈之戊戌公車赴禮部試見其人朴誠無文呐呐如不出諸口其言或不誣也

京師羅城築於前明嘉靖四十三年六月見明

世宗實錄

魚門古鄒城也見名勝志老友程君晉芳生非其地而以爲號想由景慕前賢耳

元朝塑像劉鑾最有聲譽然尙有阿尼奇者畫像塑像亦極精工元史有傳

頃閒腹塘戴主政璐見示已卯春時隨休寧金公畿南學幕晚駐寶店壁閒見女子題詩六首筆墨柔媚惜乎漫漶姓名剝落不可辨識僅有一首尙爲完美其詩云極目蕭蕭易水聲一腔

幽恨最難平燕丹已是無家別枉指歸期馬角  
生詞憶淒惋急錄而藏之篋衍及至秋末回京  
重經此店則店壁已重粉矣

湖廣沔江有水陸寺寺前有澱潭深不可測名  
蓮花潭初秋涼月之夜閒有蓮花浮出潭面香  
氣襲人

碧雲駁蓋魏泰所作嫁名於梅堯臣當時士大  
夫每以私怨肆口謗人此書幸人皆知出於魏  
手故聖俞不蒙其咎至元人陸輔之一跋全未

深晰極稱許其足補當時遺事非後人可擬殊屬憤憤

慶壽寺亦名大慈恩寺在內城西邊碑乃金党懷英分書党素工篆隸然世不多見

蟪蛄卽螭子一名壁錢一名長脚幽州人謂之親客蓋此蟲上人衣必有親戚至也

賣皮貨客每於九月晦夕聚飲候至宵分交子之時占驗西北風急則冬令必嚴寒皮貨希得善價交相酬酢歡呼達旦

萼山先生者名永年嚴嵩僕也雙山主人者名徐賓張居正之僕也

柳柳州有罵三尸文蓋祖東方朔罵鬼書按三國志華陀傳言漆葉青黏散久服去三蟲三蟲卽三尸蟲道家稱爲三彭名彭琚彭瓚彭璣又名三姑青姑白姑血姑是也於庚申日上天言人過惡故有守庚申之說

華亭吳六益訪家鈍翁於京邸時六益被酒自誦其所作游五嶽諸詩音韻琅琅鈍翁擊節極

稱賞之

萊陽姜主事垓在禮部以言事廷杖遣戍安徽之宣城縣遂自稱宣州老兵予曾得其牙印甲申後賦詩曰橋陵千點淚獨在敬亭山及將終屬其二子安節直節曰敬亭吾戍所也吾未聞後命而君亡必葬我於是二子從之不以國變而亡君命真純臣也良可悲歎

後漢兩王霸字元伯者爲上谷太守封淮陽侯字儒仲者王莽篡位棄冠帶隱居守志



紀曉嵐侍郎曾爲予述在烏魯木齊得悉昌吉  
築城掘土至五尺許獲紅繡花女鞋一製作精  
巧尙未朽壞然入土已五尺許非近時可知而  
昌吉婦女無纏足者殊不可解

定制六部滿侍郎只許坐車前有二役引路入  
署却喝長道

康熙年間惟翰詹兩衙門稱老先生今則無人  
而不稱老先生矣

近年上元張燈惟前門外各大店中及西河沿

綢緞鋪人參鋪打磨廠東西江米巷中稍有可觀而大柵闌火寶塔鐵門之大判官則每歲必設也

寶山閨秀毛萼華詩人海客之女也聞蟬詩云雨過空林逸響清蕭疎碧樹寄寒聲何因長占高枝上每向風前嘒嘒鳴頗有寓意

陳本忠字伯思昌平州人乙丑進士現任農部主政最工制舉文性亦極嗜咕嗶純熟之至無日不作帖括然詼諧瀟灑絕無迂腐習氣善庖

饌處境非有餘而宴客劇精美豐盛

水曹清暇錄卷十四

古歛訥葺汪啓淑述

丙寅秋客秀州曾見前明楊忠愍公繼盛手製  
一葫蘆罇上有小行書云釀成四海合歡酒欲  
共蒼生同醉歌歎署嘉靖己酉歲秋九日詩椒  
山共二十五字英氣凜然不知流落誰手

廣西平樂府昭平縣有獐婦名閉阿陸生於前  
明嘉靖十二年至 國朝康熙丙午歲已一百  
三十四矣子孫曾孫皆故惟一元孫扶掖之年

亦五十餘矣平樂司理迎之至署贈以簪珥食物能漢語尤善飯雙眸碧色髮由白重黑轉黃齒凡三易矣

墨菊產於朔庭中州近日亦有宋馬揖詩云獨抱緇衣對曉寒天然清淡惡華丹多因元亮題詩筆灑在枝頭濕未乾

金山縣金山每歲廟神誕日有魚名黑隘大者如山羣引海族來朝率午方退事見邑乘

孝廉周軼韓錢唐人性豪直善鑒有膽量少年

偕友夜泛西湖友謂軼韓曰淨寺長橋之側多  
鬼君敢往乎孝廉欣然前行衆友尾之遇夜撒  
網者乃周管墳人也孝廉假其網命僕負之偕  
行乘月遍遊近山僻路一深林中隱約見紅衫  
少婦詫謂其僕曰深夜安得復有少婦獨出定  
是鬼矣少婦聞聲直撲向前冷氣逼人孝廉與  
僕亟撒其網少婦遂不見而得尺許枯木衆友  
亦至其攜至管墳人家還其網用鋸鋸其木血  
水淋瀝適見有盛油小瓶因就火煎之木化青

煙臭不可聞周孝廉親向予說

紹興戢山戒珠寺晉王右軍羲之遺宅也前殿  
祀右軍中殿供奉世尊後樓有卧佛床第衾枕  
錦帳珠簾邦人兒女夜不安寐者禱則必應報  
賽無虛日

瀛臺在太液池之南一名趯臺一名南臺入紫  
光閣門乘小舟可達夏月上嘗御瀛臺內殿  
辦事部郎或陪奏或侍班或帶領引見方可  
得到紅荷綠柳翠藻銀蘋景最幽勝

丙寅春予薄遊吳門天平山石鉢菴登一小閣  
壁閒有采香女史題詩云羣峭摩霄漢春雲碧  
似煙筍輿閒裏到粥鼓靜中緣已悟無生理羞  
參杜撰禪憑闔凝睇好梅竹劇嬋娟墨痕未燥  
書法纖媚詢之菴僧云頃有大家內眷數人來  
遊曾索筆硯想必題詩也惜無山考其姓氏書  
中偶檢得舊抄漫錄於此

順治十年四月餘杭虎荒太璞山前尤甚忽來  
一巨獸其形如馬而高幾倍紫鬣黑尾能食虎



於是虎患息獸亦不知所之事見邑乘

陵夷卽陵遲也陵遲細微之意陵遲處死蓋云細細處死耳

高僧傳支道林養一鷹或問之答云當以神俊故唐司空圖退栖詩有支遁何妨亦愛鷹句今但傳其愛馬何也

瑤峯梁相國會稽人封君名文標幼失怙恃多病醫家已覆不治遇異人授丹三粒服之遂強健以資官刑部司獄恤囚苦除積穢蒸濕種德

甚深受知於勵文恭公得達 天聽擢本部陝  
西司主事平反積案無數故公得大魁天下官  
至極品天之報施不爽若此

龜蟲無詠之者休陽黃夏松社著五律一篇似  
有所寄託其詞曰溫飽無如汝秋宵底不平爨  
餘紛短羽燈下苦長鳴豈爲桐焦惜應傷笑曲  
情黃梁方夢夢慎勿遽相驚

百行惟孝最重前明通州孫秀才某母故貧無  
以襄大事憂戚甚夜有巨鼠十數曳錢十幾貫

委床下遂獲濟其用人咸以爲孝感所致

常熟蔣文恪公溥賜第在內城西李廣橋署年  
讀書平臺夜午每呼童僕雖有應聲而無人至  
一夕喚館伴令持燭欲出屋小遺屢喚屢應而  
終無人進室起見月籠窗戶遂獨出外見一人  
枕限而卧心疑家人倦睡就視之乃一皂衣方  
巾狀如世俗所塑土地者忽爾不見  
人被蜂螫拔去刺後以熱酒洗之卽愈被蜈蚣  
咬取大蜘蛛覆所咬處吸去其毒卽愈其蜘蛛

須投水中一過方不死

民母嫡母也見漢書服虔註又伯厚漢制考云  
始生子爲鼻子

吳殿撰錫齡同郡休陽人也大魁後無幾卒於  
京邸瀕危謂其夫人曰我前生某僧也因募修  
徽州孔道數十里之功乃獲此報又以爲沙彌  
時不守戒律故弗永年歿後其夫人感痛遂自  
經殉之蓋三十年前某寺僧念某路崎嶇行旅  
維艱發愿募修而慮人之見疑與吳殿撰太翁

約募得金悉歸太翁司出納僧頗竭勞悴遂得  
周道如砥僧尋圓寂吳太夫人婉身時見僧來  
後堂乃生殿撰公

常言天下本無事庸人自擾之見新唐書陸象  
先傳

崇禎壬申年四月二十一日大通橋下水聲如  
雷有白獸似犬擁波而馳至下流十里小聖窩  
而伏見帝京景物畧

貓食薄荷則醉鳩食桑椹則醉虎食犬則醉魚

食茶葉則醉雞食蜈蚣則醉

聚燕臺在蕃育署卽前明上林苑也去都城七  
十里每歲秋社燕將辭巢必各將其雛千百成  
羣來聚此臺呢喃竟日然後分翔而去

長洲閨秀程夫人顧信芳號湘英著有生香詩  
稿予已撰入擷芳集其詞亦清麗可喜漫錄數  
闕於此其菩薩蠻云春雲剪剪春烟薄春歸無  
計留春著獨立小橋風飛花滿袖紅鱗鴻鄉信  
斷離夢天涯遠芳草綠羅裙雨痕和淚痕其搗

練子云雲漠漠水濺濺短棹夷猶破曉烟疎柳  
斷橋迷翠靄一川風雨暮秋天其浣溪沙云柳  
色銷魂草帶烟點溪荷葉小如錢畫梁雙燕舞  
翩翩夢裏好花空自惜愁中春色若爲憐病餘  
無奈困人天

虎邱寺正殿階級俗稱五十三參進香女婦憚  
於登頓令輿夫肩而上之及下山又以危險心  
怯每命輿夫倒擡故丹徒鮑臯竹枝詞云妾自  
倒行郎自看省郎一步一回頭

太夜池卽西海子在西安門內周遭約有數里  
上跨石橋東西列白石坊表曰金鰲曰玉螭其  
瓊花島五龍亭立橋上望皆可見雖盛夏時經  
過清風拂面綠水迎眸亦忘炎暑且有紅荷綠  
菱吹香人面白蘋紫荇敷翠波心恍若置身於  
小李將軍金碧畫中誠大觀也

乾隆乙丑歲簡齋袁太史枚改官知江寧縣五  
月十日天發大風城中晝暝如晦有韓姓女子  
年纔十八被風吹至銅井邨離城已九十里矣



其邨民詢明來歷送交女家然其女已字同城  
李秀才之子李疑風無吹人至九十里外之理  
慮有別故投牒簡齋求斷退婚簡齋援引元朝  
郝文忠公陵川集爲據愷切開導秀才始肯迎  
娶終成夫婦

延平山有朱竹丹徒縣有黃秋海棠龍巖州有  
紅茉莉京師盧師山有白櫻桃安得小庭植此  
諸异卉而日婆娑其下也

宋王元之小畜集有還揚州許書記家集詩云

高陽許公精六義獨向聖朝生後嗣因將先集  
進九重高步金臺曳珠履自注云許渾孫進家  
集得官當時進書之賞其重如此

鄭櫻桃男女有二人皆美麗一爲石季龍優僮  
一爲晉冗從僕射鄭世達家妓

武清縣卽舊雍奴唐時改名去通州五十餘里  
舊城因洪武初遭水患乃遷於西八里許元衛  
帥府鎮撫衙縣南八十里有三角淀卽古雍奴  
水淀周廻幾二百里別名筍溝

五指之名曰巨指曰食指曰將指曰無名指曰小指見春秋正義然巨指又名巨擘將指又名中指註疏又以足大指爲將指也

薊州西北有盤山因田盤先生家於此耳一名盤龍山蓋以形似稱之也高二千仞外骨中膚石如人力所壘奇峯怪岫莫可形容山分上盤中盤下盤上盤有巨石以指搖之能動數人搖之則反不動有潮井龍潭及澤鉢泉中盤有白巖嵐光雲氣迷濛望如濕銀下盤有廣濟寺其

山周圍約百餘里有茶子菴環翠亭法藏寺懸  
石亭舍利塔無梁殿天成寺李靖菴舞劍臺雲  
罩寺雙峯塔仙師臺諸勝跡除夕有神燈之異  
北方幽境惟此收靈鬱秀爲最

燕地苦寒冬時比戶皆卧熱炕西山之煤價不  
甚昂頗獲利濟予性雖不便然甚喜之擬作一  
長詩以紀其事頃閱朱少章弁聘遊集有炕寢  
五古形容殆盡因錄於此用代予意其詩云風  
土南北殊習尙非一躅出疆雖仗節入國暫同

俗淹留歲再殘朔雲滿崖谷禦冬貂裘敝一炕  
且跼伏西山石爲薪黝色驚射目方熾絕可遇  
將盡還自續飛飛湧元雲燄燄積紅玉稍疑雷  
出地又似風薄木誰容鼠棲冰信是龍銜燭陽  
曦助喘息未害搖空腹惠氣生袴襦仍工展拳  
足豈惟脫膚鱗兼復平體粟負暄那用詫執熱  
定思沃收功在歲寒較德比時煥雖餘炙手焰  
寧有爛額酷矧當凝沍晨炎帝獨回轂元冥眞  
退聽祝融端可錄嗟予亦何者萬里歌黃鵠偃

仰對窗扉妍暖謝衾褥壯懷羞寵媚晚悟笑突  
曲因思墮指人暴露苦鞭笞頻年未解甲蹈此  
鋒刀毒遙知革輅中盱食安豆粥陪臣將命來  
意懇誠亦篤有奇不能吐何術止南牧君心想  
更切臣罪何由贖此身雖自溫此志轉煩促論  
武貴止戈天必從人欲安得四海春永作蒼生  
福聊擬少陵翁秋風賦茅屋

南書房在乾清門內西邊坐南向北 上書房  
在乾清門內東邊坐南向北諸 阿哥 皇孫

肄業處也

油牕明亮勝於蠡殼光潔絕似玻璃惜乎質脆  
然價甚廉產於西山石洞中蓋白石耳逐層鏤  
出便皎薄如帑僅三寸不能得寬廣者

繩匠術術有休寧會館蓋前明許相國維禎舊  
第也屋宇宏敞廊房幽雅有古紫藤二馬纓花  
一相傳乃相國手植

龍能易骨象能易牙蛇能易皮駝能易毛鹿能  
易角螺能易殼蟬能易螯

大藏經廠在西安裏門街北前明貯釋藏諸經  
今仍其舊焉

唐賢多工書如溫飛卿素無書名然有人偶得  
其詩稿筆法精雅蓋唐時有書學見唐書百官  
志凡貴臣子弟性識聰穎者以爲宏文館學生  
而平人有善書者亦得名入所爲上有好之下  
必有甚焉者矣

前明京官皆不用傘惟入幃考試官及狀元歸  
第方得用之 國朝京官卽部屬康熙年間尙



乘肩輿輿前有掌扇雍正初多乘驢車而扇亦不用今騾車有極華者而扇却未覆

宛平縣西約二百里有百花山頗多花卉有未經見莫之能名者然產毒蛇長只七八寸人被蠶竟不救

燕京歷代事跡最多宜於懷古之作故饒佳句而悔餘查慎行次學政劉雨峯燕臺雜興十首尤賅博雄健故全錄於左其詩云九關王氣鬱千秋如此風光蕩客愁東路雲垂遼海闊北條

山勒太行收天蟠宮闕瞻螭尾地擁塵沙散馬  
頭老柳不禁吹笛意夕陽疎影傍高樓千古荆  
丹事最奇誰教秦騎竟橫馳漁陽鼓動天方醉  
督亢圖窮悔已遲他日酒徒猶擊筑向來博道  
抵爭碁無聊尙有酣歌會不似東方但苦饑北  
史流傳樂未央上都幾處闢球場幕南地空聞  
傳箭花外樓高見洗粧紫色蛙聲雄八族烏衣  
馬糞咲諸王分明裂帛湖邊月及照三朝舉國  
狂十三陵古隔巖關往事低摧父老顏黃鳥哀

歌經國恤紅巾新籍點朝班金戈運啓驅除會  
玉匣書留想像閒斫却冬青人盡識稜恩羊虎  
尙斑斑直放江湖日夜東異時黨論比狂風清  
流禍起名賢盡甘露謀疎國運終一紙興亡看  
覆鹿千年灰劫付冥鴻時平翻幸吾生晚不見  
郊原戰血紅班馬文從一代編世家人物數華  
顛藏書已獻言何諱焚稿無期客問年莫道汗  
青從蠹蝕好憑頭白寫蠶眠諸公衮衮皆才彥  
珍重須教信史傳帳殿崔嵬今閭寥凱歌連歲

奏鉦饒雲深雁路朝盤馬雪點狐裘夜射雕都  
護玉門關不設將軍銅柱界重標職方別載魚  
龍國咲指烽烟薄海銷恩波一夕滿江湖下詔  
蠲租例久無忽見黥黎成感涕始知草野愛微  
軀龍船旗鼓三江戍馬鞭雲霞五岳圖盡道登  
封儀注古秦松容易比貞符朱門檠戟列東華  
金谷筵開辨咄嗟雪甕分漿啖梢柑霜刀剪韭  
茹萌芽歌喉欲斷從絃續舞袖能長聽客誇歲  
得狂生無藉在欲捻書籍問東家百分一棹過

觥船何限關河載酒前投筆生涯經絕域定巢  
歸計失驚絃縱橫野馬羣飛路跋扈風箏一綫  
天曾是征南舊賓客摩挲髀肉也潸然

天壇在正陽門外周十里園邸臺高七層郊天  
諸祭幃幔器皿純用藍色

薊州甘泉寺有蛇亦名小青龍然不似譚柘寺  
盧師之所畜也與人狎習時盤宿於禪榻亦不  
燕人兼能致雨

箬漠鱻國語也熱河山澗魚名似鱸而味鮮美

蒙古語謂之集伯格吉林語謂之赭鱸

瑛中翰寶字夢禪號問菴滿洲正白旗人大學士永公諱貴之長子也能詩善畫與予同有印癖愛潔耽閒品度瀟灑官內閣中書以足疾辭杜門削迹日惟種竹藝花信是雅人

李翮號春麓山東金鄉縣人禮部祠祭司主事雅善詩餘一日過予寓怡南寄黃柑至因其剖之春麓隨填綺羅春一闕頗佳爰錄於此其詞云喫手黃金充盤嫩乳漱漱清泉流齒蠟蒂融

封最是泥山之里消幾日秋風水驛裏殘葉載  
來燕市伴銀鱸紫蟹同嘗洞庭風物可曾憶傳  
餘芳馥滿袖堪咲歸遺恁晚一燈眠未試擘新  
霜採取箇中滋味把詩卷並咀清香早羞煞北  
山酸李

坐中出樊榭山房見  
示多早年倡和之作

待從君共覓江鄉

買舟斜照裏

常言俗語多有來歷蓋人習以爲常多不討究  
如不可無一不可有二見南史求忠臣於孝子  
之門見孝經緯風流罪過見北史三世仕宦方

會著衣吃飯見魏文帝詔書三十六策走爲上  
策見齊書好物不須多見晉元帝曲宴賦多言  
多敗見金人銘鵲蚌相持漁翁得利乃蘇代對  
燕王語吹毛求疵見韓非子嘖有煩言乃衛敬  
子謂衛靈公語見咲大方數米而炊見莊子官  
久自富見史記貨殖傳福無雙至禍不單行見  
說苑談何容易見非有先生論寧逢惡賓莫逢  
故人公孫宏語酒囊飯袋見論衡開心見誠馬  
援對隗囂語求田問舍劉先主語人面獸心見



宋書明帝紀名士風流見齊書掩耳盜鈴見通鑑上不上下不下見田季安傳如此甚多不勝枚舉

內城蘇州術術有苦井宏治年間元旦有術士汲井水至甜井中易水而來向井咒詛其水遂甜直隸有苦水舖經今上更名甜水舖其水果變爲甜

晨食隣切早昧爽也以曰辰蓋古人不夙春黎明而起卽以曰春米而食是其時候俗誤信釋

名以爲日光復伸爲晨謬甚

劉公敵安徽潁川衛人乙未進士官吏部賦性曠達嘗飲酒慈仁寺古松下游人至不論識與不識卽招之同飲淋漓酣暢而後已

曉園族兄往年賃居閭王廟街屋院中有大棗樹前明所植每當月明之夜時遙見橫枝坐一紅衣女子垂足於下了不畏人近則無所覩擲以磚石亦不懼主人云從不爲害疑是棗樹之精族兄賃住雖不久終無他災異也

曩年吟侶鵬亭戴廷禧下榻余家開萬樓時一日早起謂余曰夜夢遊一靈山遇絳衣仙女極娟麗吟詩一章爲余誦之適有客至未及寫出頃記憶僅得一聯云草香侵曉袂花露滴春衫漫錄於此

考試武進士弓箭每在紫光閣下看溜冰搶行頭每在瀛臺

大內夏月所用冰塊皆係工部監造冰窖冬月藏冰屆期送入以供內用都水司經理之

歲修東西各  陵每年  欽點二司員經費在  
節慎庫支領帶諸匠工往辦如有數千兩工程  
則  欽點大員督理

婁縣諸生孫某女玉貞工詩十五天折臨歿有  
句云來宵樓外三更月空照梨花一樹春同邑  
張茂才與載輓詩云明月梨花景剎那激之悼  
女淚痕多奩遺鴛結師心巧詩勝龍褒信口哦  
閱世偏憐年歲促遊仙半是病愁磨他生須做  
紅樓客慎莫當歌喚奈何

水曹清暇錄卷十五

古歛認莽汪啓淑述

秘魔厓西大圓通寺藤胎大士及火裏金剛像  
皆奇古惜今皆不存矣

鮑中書之鍾一日於書牕前見墜一蜘蛛家人  
欲撲殺急止而縱之次夕忽被胡蜂螫其手登  
時紅腫而蜘蛛自來書案因聞人言蜘蛛能收  
蜂毒遂取置患處俄頃紅銷痛止而蜘蛛僵矣  
似報之者

雍正初年奉宸苑畜白孔雀一雙觀者頗多題  
詠山陰寶意居士商盤時爲庶常有五言古詩  
一篇甚佳

揚州衛運弁馬坦直隸獻縣人其署駐高郵州  
係前明總鎮廢衛房舍深邃多半闢敗其傳其  
中多狐崇坦居之無所患坦于公餘嘗與室人  
圍碁遣興一日正下子時忽聞承塵之上微作  
笑聲坦心知爲狐也詢之曰僊人有何好笑答  
曰笑賢夫婦雅好牧豬奴戲而無高著耳奴名

七僊姑頗爲基友所推尙輸家老太太四子如  
老太太者乃第一國手欲以局勢相傳奈去此  
道甚遠不可教也坦曰仙姑可肯現形賜教否  
狐曰奴母女名登仙籍不顯以貌示人汝署中  
二小婢蘭香蕙香吾所鍾愛令其掃除淨室設  
箕蒙以黑帕下縛牙箸隨箸指點黑白分明奴  
于暗中教導賢夫婦作壁上觀其藝自進坦如  
法佈置二婢皆默聽指使狐意所向無不適也  
其老狐每贏二子七姑亦時負四子坦或三五

日一請或十餘日一請其旨奧妙坦夫婦時多  
不解一日向州司馬姚掄有名一元者述其異  
姚曰須得一高棋人與之對局方可以辨真僞  
適有江都令楊某來署州事楊頗自負國手掄  
有邀與同往至坦之室適都閩某亦在坐其坦  
四人列坐西階東階設一客座二婢扶箕以待  
俄延箕動且作軟語婢曰請諸位老爺入客位  
掄有曰敝堂翁仰慕仙姑高碁敬求對局箕再  
運動婢曰老太太海外雲遊仙姑可以手談數



十著後楊大驚異曰眞仙著矣僕萬不能及祈  
仙姑稍讓勿令我全局俱輸楊每下一子籌思  
再四而箕隨箸指示畧不經意局終楊負二十  
餘子楊素好勝有奕名至是汗流浹背巧辯曰  
仙姑碁品誠高然余心尙未服如下某一著時  
則某多輸數子何乃見不及此箕忽又批曰太  
爺原討饒讓今以讓著藉爲口實何涵養之未  
深而介介于勝負也衆慙其復行對局楊慚拂  
衣而去此乾隆丙申年事

神異經十洲記僞託東方朔名洞真記僞託郭子橫名然文筆甚古似非六朝以後之人所能作也

張鳳孫號少儀吳門名士也戊午秋赴北闕名落孫山抑鬱旅邸忽患回尿之症初似白濁小便不利飲食如常三日之後所積既多坐卧不寧腹鼓如箕百藥莫效諸醫束手親友代爲遍求治法遇一老者云有一方須用雌牛陰毛如男患此症者則用左邊女則反是煎水熏七日

七夜之後小便自然徐來若一曲身阻折則仍無濟但其痛不可忍必須多人挾之毛少湯多人多不信然已莫可如何姑試之而七日後果然大通尿既下盡人便清爽惟狼狽甚大服參耆方得痊可後來少儀年踰古稀官至觀察精神頗健

乾隆甲午歲河南臨潁陳翁有子某爲名諸生時方鄉試翁於家營建客廳忽折一梁差人於鄰村尋買翁鬱悶晝寢而匠亦偶無事假寐夢

至數里外一集市見有奔走匆忙者如報錄人  
狀匠問曰汝報錄人乎其人曰然匠曰某村陳  
秀才曾否有名其人曰有之匠曰汝不識路徑  
吾爲導引至其家何如其人言不敢煩勞自當  
得星而往匠曰於夜閒報之乎其人漫應之曰  
然醒言于翁翁亦與同夢及客廳落成豎匾因  
係陳姓又以夢徵額曰德星堂用太邱故事已  
而榜發竟無名以爲夢不足信及丁酉歲始捷  
而聞中詩題爲德星聚主司爲項太史家達戚

民曹蓼生一爲德清縣人一爲星子縣人德星之說蓋驗于此

族姪文亭昨以蕪湖閨秀絳雲黃鳳詩囑選尙有憶外詞一闕調寄如夢令頗佳其詞云晝永春愁如病望斷天涯芳信薄倖慣飄蓬空把金錢卜盡愁聽愁聽人道端陽將近

頃承盛秀才灝元寄贈金朝官印一鈕方幾二寸生砂活翠頗堪賞玩云從或軒陳森年少尹得來陳官陝西巡檢日厠卒掘解後隙地見之

文曰提控所棗字印背刻興定元年九月行宮  
禮部造真書考興定元年乃金宣宗珣由昇王  
卽位之五年宋寧宗嘉定十年丁丑也先是宣  
宗以貞佑二年甲戌徙都于汴梁明年乙亥蒙  
古焚燕宮室殆盡兩河蹂躪國勢日蹙越二年  
因而改元興定

大興朱學士筠竹君品學兼優洵爲一代文人  
視學安徽時提拔孤寒表揚節烈人甚德之而  
以吾郡老儒江永汪紱入祀鄉賢祠尤爲善政

摹印雖小道然能知大方得古趣而不落匠氣  
殊不多見曩年錢唐推丁龍泓敬爲能事近時  
輦下惟鑾儀衛雲麾使盧白劉君淳漢軍閒散  
嘯崖甘君源尙宗漢燈者其寓公則黃吏目易  
董主簿洵頗高古

易侯易

廣平縣飛狐口及熱河隣近皆產飛狐銳首長  
尾毛深褐色翅如鼈裙四足縮軟翅中前二爪  
後五爪能飛然只丈許

廣西容縣老君洞天生石人龐眉癯體手持一

杖綬寧縣遇仙洞天生石大士衣褶纓絡頭面  
宛然蓋天地之巧無所不有耳

曩年江浙盛行洋蟲飼以沉水香屑穀花生搗  
用酒衝服云能益精蓋產黔省名九香蟲潛伏  
涯石下土人掀石取之以售人信能宜子洋蟲  
蓋託名也

綏寧辰溪水族最多而獨無蝦甲魚有大至四  
五十觔者見包汝楫南中紀聞

珉明府玉字霞川號琢如鑲黃旗人以明經出



宰含山諸邑後聖吏議羈跡西曹然詩筆頗清  
麗著有拄笏軒詩鈔年來尤發奮讀書造詣更  
不可量漫錄數篇於左其寄懷善旭田詩云秘  
苑橫經日金門射策年座陪多士末心折大巫  
前粹質南金貴精心碧玉纈百家資斧藻二酉  
悉窮研風雨神隨腕珠璣欬落天萬言輕寸晷  
一紙重千緡春老香心醉秋高健翮騫桂枝談  
笑掇柳葉等閑穿品彙需陶鑄經綸待仔肩故  
人欣鵲起薄宦媿蠕拳出祖時初夏分襟路幾

千風流瀛海郡雲涌岱宗巔魯酒難消夜齊姜  
詎解憐亂蟬鳴古驛一鳥下荒烟節物更南國  
良朋隔古燕聞雞慙劒漜聽雨憶床聯岑寂尋  
山屐迢遙訪戴船霜嚴孤鶴警風勁塞鴻偏冉  
冉歲云暮溶溶月復圓琴樽虛几席松竹翳林  
泉髡柳因風折寒梅待驛傳江鄉足離思短札  
未能宣其詠雪竹詩云誰傳粉本寫篋簫千個  
垂垂爾許長寒玉璫瓏明渭畝冷雲重叠傍瀟  
湘凍禽雜語棲難定白鳳因風勢欲翔最是亞

簷搖瘦影月櫺清映竹書光其送沈北山還杭  
州詩云秋好延佳客風流得隱侯詩如蒼鶻健  
人比白雲幽湖海名徧遠丹青技獨優煩君埽  
空闊乘興到滄洲其濡須塢詩云長江西來拍  
涯怒兩峯屹立削天柱誰憑塹險扼上流魏北  
吳南爭一塢建安之歲競吞噬樓船蔽天沸金  
鼓飛揚日月白羽光百萬健兒盡虓虎老瞞鴟  
吻信猖獗碧眼紫髯亦英武巖城巖嶮偃月寒  
夾寨臨波截橫堵千秋江左擅形勢六代川原

咸揖俯傳聞宋若更修築木棚金垣鑿牙弩貌  
貅再集鐵鎖沉戍士還憐烽檄苦雄圖伯業幾  
乘除舊壘荒烟蹟難數至今四海歸一家淨洗  
甲兵還太古雲中巢子螺髻青波上釣磯沙燕  
舞江平如鏡散霞綺落日蘆芽響柔櫓昔稱險  
要今坦夷但見遙山似睂嫵格局皆老

鳳洲筆記稱薊州周氏薏苡酒爲第一清冽秀  
美今則惜無之矣

青蚓崔子忠工圖繪明末頗有聲譽時稱南陳

北崔陳蓋謂老蓮也昔予客錢唐丁隱君敬無  
不敬齋曾見青蚓伏生授經圖人像古拙衣服  
雅馴頃又於沈員外世煒小酉山房見洗象圖  
雖用石青硃砂然古致磊落信是高手

五雜俎云京師天無時不風地無處不塵物無  
所不有人無所不爲近則玉燭常調頗無勁颺  
疾暴街衢灰土亦稍凝淨蓋人傑地靈耳

京師所產水果其最佳者馬乳葡萄蘋婆果無  
核棗蜜桃龍鬚菜白櫻桃皆吾鄉所無者

淶水亭雜識載功德寺唐眞覺禪師役使木毬  
呼僕延客皆令木毬往來嘉泰年間寺遭火災  
木毬自滾入池故得不壞功德寺今爲檀栢下  
院詢諸閣黎無知其事者究竟不知木毬之所  
終矣

夕照寺在崇南坊前明所建本朝修葺然無碑  
記可考今爲寄頓族櫟之場矣

香山有巨石二狀如蝦蟆石下有二井相去僅  
尺許水不甚深然清冽甘芳廻異他處

土爾虎特國在鄂羅斯西去京師二萬餘里其  
主名阿玉氣康熙五十一年曾進貢隨差兵部  
職方司郎中圖麗琛答問由張家口喀爾哈經  
鄂羅斯國所屬揭的河鴉班沁喀山各處至土  
爾虎特國阿玉氣汗遣其部下台吉番僧及莽  
武特頭目恭迎 諭旨後排日筵宴五十四年  
三月復命繪其沿途山川輿圖名異域錄以進  
又云鄂羅斯西北尚有圖里耶斯科西費耶斯  
科博爾託噶里牙付蘭楚斯雅爾馬尼牙宜大

里牙宜斯巴尼牙狄音和爾斯提音布魯斯奇  
博爾斯奇別穆斯奇賽薩林穆斯奇昂假爾斯  
奇賀闌斯奇博玻林穆斯奇肆班斯奇各國南  
面尙有哈拉哈兒叭哈薩克策旺拉布坦布魯  
特莽武特布哈爾哈薩兒什伊爾欽哈什哈兒  
庫策阿克蘇吐爾們沙障諸國

傳奇多半海市蜃樓然閒有考據如梳粧跪池  
頗覺形容方山子太懦但東坡忽聞河東獅子  
吼及容齋隨筆所載山谷與季常兩簡則懼內



實似有之

曹習菴中允仁虎嘉定縣人吳中七子之一也  
詩文典雅腹笥賅博惜不輕梓全集以傳海宇  
頃偶見其庚寅消寒雅集寒齋十二詠甚佳漫  
錄於此其詠璫簾云換却湘筠箔蠻璫製早成  
壓風宵有力捲雪曉無聲野馬飛難到檐禽掠  
不驚留香宜寂坐罕地倍盈盈其詠風門云瑾  
戶窮冬候仍留小扇通高低全暎日啓閉自當  
風薄楮糊偏淨單繩引最工未須簾幕障虛白

愛疎櫳其詠煤炕云十笏封甄地縱橫石炭藏  
煖應同鍛竈寬更勝繩牀體粟全消凍盆花易  
放香冬烘君莫笑趺坐卽溫鄉其詠炭爐云梢  
梢初生燄盈盈品字堆客偕燒栗坐僮趁煮茶  
來烟向重簾放春從密室迴莫教停宿火留待  
煖深盃其詠煖硯云炙得紅絲硯陽和在案頭  
池方知凍解石小看雲浮玉注傾長潤銀毫蘸  
不留熱中應笑汝卽墨待封侯其詠火盃云范  
錫成羹器當筵活火承金壺湯尙沸碧燄酒偏

騰自異孤鐙煮直疑列鼎登饒奴知不禁煨食  
候堪乘其詠圓案云莫訝模稜搗壺觴地較寬  
座休分上下話自愛團圓四面圍俱好三隅反  
定難客來占不速隨意席能安其詠矮几云方  
壽東西列中央一几陳明牕長透影細罽不生  
塵抱膝攤書慣支頤把琰頻嗒然閒隱處虛左  
待嘉賓其詠套杯云子母傳杯撓花瓷箇箇圓  
徧嘗宜大戶分勸到長筵酌彼隨賓主中之判  
聖賢劉家數三雅何似十卮全其詠掛瓶云界

壁亭亭影陶瓶質少瑕一層依雪紙半面插唐  
花合付琴囊伴休愁燭案遮絡來橫幅伴相映  
折枝斜其詠酒籌云筵半傳觴政牙筓出鏤籤  
每隨觥使送頻對燭奴拈摘句詩牌小分巡酒  
陣嚴座中探欲徧百罰各無嫌其詠烟筒云學  
得餐霞法筠竿巧製宜吹噓長日便冷煖一心  
知入手同操管隨身等似鰲賓筵分送早便抵  
渝春旗

崇效寺在外城西南隅古棗花寺也康熙年間

有僧某頗得聲譽新城王阮亭秀水朱竹垞諸前輩皆有詩贈之至詩卷今尙存寺頃方以部昂邀蔣編修士銓翁洗馬方澗程編修晉芳陸太僕錫熊吳編修錫麒及予聯吟其中

前明奉天門常朝御座之後內官手持一物用黃絹包裹之似扇其實非扇名卓影辟邪永樂時外國所進見菽園雜紀然不詳著形狀他書又皆不載當俟博雅者考訂之

歷朝年號正統與僭僞相同者甚多漢武號建

元晉康亦號建元苻堅亦僭號建元蕭齊高亦  
號建元漢武號太始張元靚亦僭號太始漢宣  
號甘露孫皓亦號甘露苻堅亦僭號甘露漢宣  
號黃龍孫權亦號黃龍漢和帝號永元張茂亦  
僭號永元蕭齊東昏亦號永元漢成號永始高  
雲亦僭號永始漢哀號建平石勒慕容盛慕容  
德亦僭號建平光武號建武晉元亦號建武石  
虎亦僭號建武蕭齊明亦號建武漢明號永平  
後魏宣武亦號永平王建亦僭號永平漢章號

建初西涼李暠後蜀李特羅尚皆僭號建初漢  
章號元和唐憲亦號元和漢和號元興孫皓亦  
號元興晉安亦號元興其安流永初南宋武亦  
號永初漢安號永寧晉惠亦號永寧石祗亦僭  
號永寧漢順號永建李恂亦僭號永建漢順號  
永和閩王延鈞亦僭號永和晉穆亦號永和沮  
渠牧犍姚泓亦僭號永和漢冲號永嘉晉懷亦  
號永嘉漢桓號建和刊鹿孤亦僭號建和漢桓  
號元嘉南宋文亦號元嘉漢桓號永興晉惠後

魏明元亦號永興苻秦亦僭號永興漢桓號永  
康慕容寶乞伏熾磐皆僭號永康漢靈號中和  
唐僖亦號中和漢後主號建興孫亮亦號建興  
慕容垂李雄皆僭號建興晉武號太康遼道宗  
亦號太康晉惠號永安孫休亦號永安沮渠蒙  
遜亦僭號永安後魏孝莊亦號永安晉帝奕號  
太和曹叡亦號太和後魏孝文亦號太和禿髮  
烏孤石勒亦號太和楊溥皆僭號太和唐文亦號太  
和晉孝武號太元張駿亦僭號太元晉恭號元



熙劉淵亦僭號元熙蕭齊和號中興拓拔朗亦  
號中興蕭梁敬號太平孫亮亦號太平馮跋號隋  
末林士宏皆僭號太平梁聖宗亦號太平陳後  
主號至德唐肅亦號至德石晉號天福劉漢亦  
號天福宋太祖號乾德王衍亦號乾德輔公弼  
反江東皆號乾德明成祖號永樂而隋郭子和  
張重華五季蠻賊張遇賢及宋方臘先已僭號  
永樂其後天順正德與前代重者不可勝紀  
前明公安袁宏道嘗謂都城古大樹有三其一

戒壇老松其二顯靈宮古栢其三韋公寺柰子  
樹皆婆娑蔭廣數畝

懷寧月邨茂才余鵬飛青年美才倜儻不羈予  
素器之頃赴宦秦友人之聘予親家並山吳珏  
有詩送之云此才猶自滯菰蘆萬里誰憐雁  
孤烟柳隋隄三月路風沙漢苑五陵都家貧未  
敢輕彈鋏志壯何勞諍三繻三遙誠侯亭官吏接  
翩翩爭指阮元瑜

長白山在故會寧府南六十里橫亘千里高二

百里其巔有潭周八十里深不可測南流爲鴨綠江北流爲混同江 本朝發祥之處也

鸚哥花產貴州鄂西林 學士有句云鸚哥幾樹紅見西林遺稿

西十庫在西安門內沿明舊制以天干排號已字以下有不全用者 本朝封錮日久其人參貂皮貴重物則置保和殿後兩小殿中

前明筆工劉必通善製硬尖鼠鬚筆及水筆頗有聲譽招牌相傳爲董香光所書其筆至今都

門尙盛行也

宋歐陽文忠公官刑部時有看海棠及看竹詩  
不以簿書鞅掌而廢吟詠

都中有無核馬乳葡桃山東有無核棗吾鄉有  
無核小柿子嶺南有無核荔枝無核則從何得  
種殊不可解

古人有以一詩而得名者如唐之崔鶯鶯趙倚  
樓鄭鷓鴣宋時賀梅子梅河豚之類 本朝王  
阮亭因和李清照漱玉詞人因呼爲王桐花崔

不雕人呼爲崔黃葉近時雷叅軍松舟人呼爲  
雷杏雨庚寅秋予薄遊邗溝有涼琴無俗韻旋  
簞有秋痕句沈茨田江亭諸君因呼予爲汪  
秋痕

水曹清暇錄卷十六

古歙認莽汪啓淑述

京城佳釀素稱竹葉飛甯煮東莢雪梨花湛白  
甕底春濃窩兒米釀藥酒則推史國公狀元紅  
黃連液五加皮茵陳綠橘豆青益壽延齡保元  
固本外販又有張灣燒酒清河乾榨汾州白燒  
潞水思源易州易酒滄州滄酒南來最好紹興  
陳醞杭州花露鎮江木瓜無錫惠泉儀徵包酒  
蘇州女貞然價極昂却總不及光祿神酎玉泉

醴酒醇而清香也

穿心瓦罐詠之者殊少。韓石錢侍郎載有五律一章云：莫笑中無有，懷之熱滿腔。熬煎深可耐，肝膽直難降。園曉雪聲竹，月高松影牕。微哦放翁句，湍轉一條江。予近亦作黑小子歌一章云：讀倦寒凝夜，方永地爐無。火香猊冷強，撥冰缸漉舊。醅欲溫，乏器心恹恹。黑小子來，殊利便親持。鵝頸挑燈燭，俄頃香生芳韻浮。數杯預把盪春占，物貴得時言可銘。失船一壺值千金，入越

何須具章甫賦成興發且高吟並載於此亦知  
蒹葭倚玉聊博觀者一笑

無花果卽古度也俗稱蓬鬆果左太冲吳都賦  
松梓古度李善注不華而實子皆從皮中出大  
如安石榴色赤可以煮食今北方甚多

裘文達公曰修一肩微側手亦參差目光射人  
具異相傳說所生太夫人禱於南京燕子磯水  
神廟夜夢紅袍神來曰與汝好兒後果孕遂生  
公故文達公臨終謂家人曰我是燕子磯水神



也今將復位汝等隨太太扶柩回江西時經此  
向關帝廟求籤如得上上則我已復位矣如其  
言果得上上籤闔家哭奠於水神廟并立木主  
於廟而解纜焉

唐朝制度凡細馬送尙乘者印以風字於右膊印以飛  
其餘雜馬送尙乘者印以風字於右膊印以飛  
字於左膊今囑人緊急者稱飛風蓋取如馬之  
疾耳

甘州地高經年不聞雷聲惟風最大至黑風起

咫尺不辨空中且有火光如電予姻婭中有官其地者爲予所述如此

惜薪司在西安門街南巷之內前明宮中所用紅籬炭皆於此收發籬以土紅塗刷故曰紅籬本朝關支柴炭皆仍其舊而籬不復刷紅亦儉德也

湯侍御世昌仁和人諸生時就鄉試僦居貢院之隣苦炎熱臭穢旁一大宅空鎖閉詢之爲前杭州守柴君所買爲公館者因有鬼祟人莫敢

住餽司鑰人假以暫居而樓上牕櫺尙完畧爲  
灑掃遂移榻焉樓西房中委棄竹箱雜物亦置  
不顧明燈讀書不覺夜半忽有披髮女人突立  
樓心湯公大聲叱之女惶恐曰不知貴人在此  
竟無狀矣退而至於西房膏沐以出則一姣好  
女子也踰而訴曰妾姓朱名筆花前杭州太守  
柴公納爲姬正妻奇妬值妾媵身賄囑穩婆將  
生桐油塗妾下體以致潰爛而卒兒被正妻認  
爲已出今已長成而不知爲妾所生他年君爲

湖北主考子應出門下懇公將妾冤告之囑將  
妾尸改葬墻東井邊有八角磚可驗也指房中  
破竹箱云是妾昔年藏有零星首飾太守哀悼  
惟恐觸目傷心未攜歸去有人翻動妾出怖之  
故人驚爲怪祟今舉以奉贈湯公慘然諾之後  
其事皆驗湯公與予交契故詳悉焉

漢翟方進喪母踰月卽起視事孔子曰是可忍  
也孰不可忍也此輩人未知何所足取

詩品貴乎翻新脫去前人窠臼方是自已詩然

須立論繩正不落魔道纔是上乘如閩縣魏憲  
明妃怨一章怨而不怒其詞曰婉轉辭明主迢  
遙嫁異鄉青蛾傷漢月紅淚染胡霜暫得恩波  
日徒成怨別腸無金酬畫士是妾誤君王深得  
風人之旨

彭芸楣先生曾述其同鄉奉新縣邨民李姓一  
婦婉身然越數日不產其家女婦伺候勞倦因  
倩鄰婦孫姓守夜孫婦攜長子往其子嗜學在  
外廂明燈閱書次日亭午門尙未啓里人疑之

劈門入則產婦死於床諸婦死於房孫姓子死於廂右手執書如故左半身似火焚者合卺奇之鳴於官相驗埋葬

相思石似雲南所產棋子而賦形微小分置盤中夜必合爲一處云產某邑廳事階前石穴內昔年予曾得數對惜皆爲友人強索去而復忘其縣名矣

韋約軒中丞謙恒太翁官學博時上司委勘沙田太翁素悉衝淤賠課之累盡心查核凡已攤

御田產愷切詳求題豁蒙准施行免受累者百餘家故約軒公得中興甲開府黔南也

都門市中水果味之美者桃有八種而肅寧最佳梨有五種而大谷最佳栗有三種而盤古最佳葡萄有六種而馬乳最佳棗有五種而密雲小者最佳李有五種而麝香最佳瓜有九種而蜜瓜最佳柰有二種而綠柰最佳菱有三種而小紅最佳杏有三種而黃杏最佳菜有天壇龍鬚尤鬆脆可口至於蘋婆文官果西山之白櫻

桃雖浪得名殊無足取也

中州陳伯恭太史崇本名門華閎然好古瀟灑  
曾見張中翰瘦銅董香光書卷心醉焉欲以精  
婢伴雲易之瘦銅猶戀戀未能割愛誠一段佳  
話也

予長女夫戊子孝廉洪榜洪坑人也其邨月形  
山前古栢一株凡攀折一枝半葉者必遭疾病  
遇本邨保安賽神卽鋸巨榦供瓶亦平安無事  
屢驗不爽



簡齋袁枚浙江錢塘人也以翰林改授知縣宰  
上元後入都感舊同年陞遷不一仿劉禹錫元  
都觀看桃詩有一絕句云曉日瞳矐玉殿開春  
風回首認蓬萊三千宮女如花貌都是明妃去  
後來

常言口號多有古人詩句如晚飯少喫口活到  
九十九乃古樂府也易求無價寶難得有情郎  
乃女貞蕙蘭詩也世亂奴欺主時衰鬼弄人乃  
唐杜荀鶴詩也難將一人手掩得天下目乃唐

曹鄴詩也一朝權在手便把令來行乃唐崔戎  
詩也白日莫空過青春不再來林寬詩也黃泉  
無客店今夜宿誰家乃明高啓詩也閉門不管  
憊前月分付梅花自主張乃南宋陳隨隱先人  
詩也今朝有酒今朝醉明日無錢明日愁乃唐  
羅隱詩也大風吹倒梧桐樹自有旁人說短長  
乃宋趙師彝詩也一舉首登龍虎榜十年身到  
鳳凰池乃宋張唐卿詩也一葉浮萍歸大海人  
生何處不相逢丁冠詩也兒孫自有兒孫福莫

與兒孫作馬牛乃宋徐守信詩也自家掃去門  
前雪莫管他人瓦上霜乃事林廣記平生不作  
皺眉事世上應無切齒人乃宋邵雍詩也善惡  
到頭終有報只爭來早與來遲見螢雪雜說是  
非只爲多開口煩惱皆因強出頭見事林廣記  
漢文帝除肉刑然武帝時司馬遷猶下蠶室考  
周禮司刑疏云孝文除肉刑蓋除墨劓與剕三  
者其宮刑至隋時始除耳

宋詩人方岳有二其一字巨山號秋崖吾郡祁

門人也著有秋崖小稿其一字元善寧海人著有深雪偶談皆有能詩聲

楊柳青地名也瀕水近丁字沽岸多楊柳一望青青頗似江南風景徐寶摩抵直沽詩樹蒸夜氣三分雨帆掛秋風一葉雲可想見矣潘季緯詩客路蘼蕪綠人家楊柳青其景如繪

古詩雞鳴高樹顛狗吠深宮中淵明歸田園詩只換桑巷二字剿襲之弊古人亦不免耶

隱峯禪師姓鄧閩人也侍馬祖居銀山山在昌

平州東北六十里山勢險峻緣石梯而登元和  
中參五臺路出淮西屬官軍與賊對仗禪師擲  
錫空中飛身而過兩軍瞻望爲之罷鬪焉

密雲縣有密雲山在縣南十餘里一名橫山縣  
之得名因山也密雲山有泉名聖水泉上有初  
月亭

發漢陵者樊崇董卓也發唐陵者溫韜也發南  
宋諸陵者楊璉真伽也

唐時緝事衙役稱不良人有不良帥主之前明

稱番役例著白犢 本朝名大班兒九門提督

主之

鏡山丁掌科田澍有詩名頃因乃孫已得縣令  
遂移疾乞假歸留別都人有句云亦知葑菲才  
無棄其奈桑榆影漸低甚得情致

賈家衡衡江南客寓第二層屋素多鬼魅滌齋  
熊公少年入都不信神鬼曾寓其處一夕三鼓  
後室中明如秉燭見一黑人自提其頭流血淋  
漓滌齋大聲喝問何人黑人以手指口似不能

言隨不見次日滌齋遷寓亦無他故

介亭周主政位庚字遷岐行九廣西臨桂縣人  
癸未科進士與館選大考降刑部主事能詩畫  
人極誠樸交友敦篤情以大通橋差不時獲與  
唱和

頃於琉璃廠見一鬼工毬對心四寸許牙色微  
黃共十三層以銀針撥之層層可轉

梁家園官房一所中有晴雲閣俯臨積水地頗  
幽靜甲午歲澄園程農部世淳曾寓其處因拉

予下榻焉宛在秦淮河房予時攜歌者吳門華  
郎童郎沈郎澄園與其妻弟吳君辛策雅善絲  
竹每逢良夜明燈置酒角韻徵歌西峯張殷撰  
書勳雅堂鮑中書之鍾鐵簫林秀才森紫樹龔  
明經怡訥旃衛上舍德威時同唱和頗得一時  
之雅

天壇中隙地產益母草守壇人煎以爲膏售人  
頗道地春時又產龍鬚菜生食香脆可口然須  
麻油清醬薑汁拌之



上元乾清宮大宴設鰲山燈預於上年秋時收  
養蟋蟀明燈時置其中宴畢樂止唧唧蟲聲自  
燈中出

琉球國人稱其國王曰屋書稱貴公子曰綠若  
秀美人曰耶蘇

哈蜜在燉煌之西去京師七千餘里其地惟產  
瓜有淡黃粉紅碧色三種不及待其熟卽摘裹  
重氈運至京師亦有剖而焙成條者耘菰趙觀  
祭翼有詩云甘瓜來自燉煌西重氈裹壓明駝

蹄或長如枕大如斗覆棚培土法未稽路遙價  
貴競珍重綠膚弗忍刮以錐副之猶恐太暴殄  
截來寸寸成方圭其中應有汁滿腹日久暈入  
紅玉肌甘芬不數文官果清脆欲饗哀家梨惜  
哉到京已冬節切處先愁寶刀折僅堪杯酒佐  
解醒未得巾絺效消熱潤肺雖同咽清露戰牙  
不免嚼寒雪我思此瓜亦熟秋夏期郵千萬里  
到乃遲色味幸非香荔變節候已等標梅悲李  
廣本足侯萬戶數奇毋乃不遇時古來物產可

移植曷弗試種當陽陂

杜詩陽陂可種瓜

君不見舊葡萄

分根自大食茱莉購種從波斯  
菠稜舊爲婆羅菜安榴故是塗  
林枝高昌葡萄上苑茂大宛苜  
蓿離宮滋卽如西瓜產回紇胡  
嶠出塞驚絕奇今已蔓延徧中  
土功妙驅暑逾涼颼可知芸生  
信蕃變遷地亦有諧土宜阿誰  
好事姑藝此未必踰淮橘爲枳  
倘同萍實結滿畦六七月閒涼  
沁齒老饕斯時快大嚼寧羨刷  
藕調冰水後漢書馮衍傳有挑  
其鄉人之妻者一段乃學

戰國策陳軫言大抵前漢書多學公羊穀梁史記而後漢書則全學前書

華陽臺在涿州之野昔燕丹太子與樊于期荆軻置酒聽美人彈琴處其址已無可考燕丹不思躬行仁義以化暴秦乃欲藉刺客行劫始王而斷無罪彈琴美人之手忍心背理故宜其終於敗忘也

王莽倘未曾篡漢而身先卒豈非賢相狄仁傑倘其志未申而身早亡遂成庸奴蓋人有幸不

幸耳

霸州城中有引馬洞直達雄縣相傳宋時楊延  
朗所穿

康熙年閒有妓餅兒一時頗擅名譽朱竹垞調  
寄一斛珠贈以詞云肌香冰雪生成命薄愁重  
登近人三五圓時月弱似春綿瑩比玉盤潔溫  
柔休把紅綾涅翻來覆去轉心熱多少垂涎恁  
時節風韻他年留待夜深說其弱似春綿蓋用  
東哲餅賦紅綾餅蓋唐時聞喜宴例賜新進士

見避暑錄話變變曉風淒淒夜冷臣當此時惟能說餅蓋用吳筠餅說其巧思殊爲可喜

西藏札卜札雅貢木椀然云係草根結成者製以爲椀食物能解諸毒此前代所從未有之奇珍也

閔貞號正齋其先江西南昌縣人後僑居湖廣廣濟縣因幼孤不獲養其雙親效丁蘭刻木而朝夕奉祀焉故得孝子之名工丹青精篆刻愛潔耽書品頗高雅薄遊修門一時名公鉅卿欽

其孝愛其藝咸下交焉正齋僦居之室手自裝  
葺遂曲折幽雅精潔洵是可人

時下凡百花卉咸備所不能過冬者惟桂花荔  
枝至於梅花竹子 內廷植之苑中亦皆茂盛  
西山潭柘蔚然成林只有茉莉夜來香等卽藏  
暖窖亦難過冬卽活亦不能有花然北產晚香  
玉濃郁亦足敵之矣歸愚沈業師曾有七律二  
首云燕市名葩兒女知較於茉莉故遲遲遞將  
暮院氤氲氣靦出美人冰雪姿布席合傾銀鑿

落對花應品玉參差且停五夜勤澆灌爲報深  
厠白露滋豈是盈盈薛夜來丰神彷彿見瓊臺  
乍經夕照澹無偶相對晚粧嬌不猜風砌玉寒  
宵欲午紗厨香透夢初回鬱金堂裏廬家婦觸  
撥愁腸未易開

近時盛行骨種黑羊皮帽其毛烏而潤倍於游  
色皮板潔白耐久然價昂甚高者須七八金一  
頂按骨種羊出西北口外以全羊骨埋之地中  
次年驚蟄發雷則小羊蹶然出土但臍帶尙聯



# 核

須馳馬伐鼓則駭而走再飼以草則長然終不及胎生羊之肥碩也

寶源局每年鑄錢三十八萬六百四十千乾隆四年該銷每千工本銀九錢一分三釐

曩年予客滬城時在洋貨行聞人領襟見一髹漆小佛龕中藏穀佛一尊佛面已雕出米袈裟尙穀皮也坐金蓮花座上龕裏泥金屈戌提繩下皆赤金惜未問其出於何國以後四十餘年竟不復見

大西天經殿在太液池上五龍亭之東北大慈  
如寶殿兩壁皆繪龍神海怪威靈照耀又有  
三大軸所畫佛像莊嚴而兼凜烈形彩陸離相  
傳乃前明商太傅喜筆也

妾字說文从辛从女辛音愆蓋有過犯之女給  
事而得接於君者俗解以爲立女謬甚又國名  
又人名漢時有妾胥妾心曲禮買妾不知姓則  
卜之春秋女爲人妾妾不娉也娉同聘

街道廳專司五城街道雖隸工部然在都察院

欽點御史滿漢二員一年一換

陳藩被害友人朱伯厚某官追哭之而徐稱未聞有知己之報

棋盤街卽正陽門內大清門前街也蓋以方石砌成故名都城人烟湊密惟此處寬爽秋夜月明恍如瑤池瑤海

商邱宋牧仲先生第四子名著字錦含二十一歲夭折雖已采芹學詩纔數月故僅存和尊人泛大江一截句其詩云駘蕩輕風日欲斜雲烟

縹緲接平沙舟人指點江天外朶朶芙蓉是九  
馬予長子繩文號海門卒年亦二十一歲詩賦  
稿已哀然成集年來東西遊走未暇綜理災之  
棗梨不禁嗟惋也